

111 年全國語文競賽客家語讀者劇場文本國小組（詔安腔）

編號 35 號

【擲牙】陳美燕原作

成過个時代，生活環境無現時恁好，衛生教育猶言普遍，大家對保護牙个觀念嘛無恁詳細。像佢，正晨早起來，洗一擺牙定，嘴擱豺，真愛食糖。所以，細子時，佢對自家恬恬牙疾个印象真深。

牙若疾起來，會愛人个命咧！細子嘍到噉噉嘍¹，大人嘛無奈無何。遐時無麼个止疾个藥，阿依喊佢：「冷水含蹠！毋好直直嘍！」講越嘍會越疾。落尾，換牙遐下，阿依吩咐，感覺舊牙有一兜仔搖，即愛用舌直直搥²；續落，兩肢手指頭拗牙搖得佢敲，毋會用張樣驚疾。若係毋認真搖，等新牙發出來，無位好企个時，「歸嘴牙生到歪膏泊杈³，遐即稔樣啊！」阿依逐擺攏恁嚇佢。

小門牙脣遐兩支「虎牙」嘛真要緊。阿依講若無較細義兜，暴出尖尖翹翹个「豬哥牙」來，遐即壞了了啊！有時務，佢脛佢懶懶、無要無緊个形，歸氣提一條白車線，拗佢个牙絹核核，出

力一揪，牙即跔白線飛出來啊。上齡擲个牙，腳愛企齊齊擊去眠床下；下齡擲个愛擊去屋瓦嶼，講恁牙正生會齊正。

記得佢有一支後角个大牙，係得做「變把戲」个人擲莫个。遐時，佢讀小學二年，有戲班來莊頭做戲兼賣藥。佢人賣一種止疾个藥水，講牙疾个時務，點落去會用止疾；牙擲莫了後來點，較緊收煞止血。佢問現場个細子：「有麼儕个牙敲敲無？佢拗佢擲，毋使錢哦！」著面講著面行到佢个面頭前。奇怪呢！佢都無講討得佢擲啊！佢噉喊佢嘴擘開，擎一支鈇，手腳伶俐即拗佢个牙擲莫啊。落尾佢想，定著係企在後背个阿依偷偷拗講个。

到較大漢來，了解牙个要緊，知愛斟酌細義注意牙个康健。真愛靚个佢，逐擺脛著自家个牙生到齊齊無歪去，正知愛勞力阿依遐時恁有耐心教佢。

¹ 噉噉嘍：音 bbee` bbee` bui`；哇哇叫。

² 搥：音 su`；推。

³ 歪膏泊杈：音 uainn` goo` ci` ca`；歪斜不正。

111 年全國語文競賽客家語讀者劇場文本國小組（詔安腔）

編號 44 號

【學騎車】李雪菱原作

講著騎鐵馬，係佢頭愛个啦，不時都騎車惹來惹去，下課轉到屋下，書包一揸¹，即去尋車來騎。若無，心情即鬱鬱悴悴，做麼个都懶懶。

遐日天氣足好，佢心肝底歡歡喜喜跔阿依去運動公園，著面騎車就山歌溜天著面唱歌，路上睺著一個阿怙教厥後生學騎車，大粒汗擱細粒汗扶著鐵馬著面走，猶大聲著面喝：「佢討放手啊，佢討放手啊。」實在哪有放手咧！

這得佢想著成過學騎車个時，遐時阿公身體猶真勇，毋知哪條腸直了，講討教佢學騎車，拗後斗个輔助輪拆莫，喊佢騎起去。阿依哦！佢噉噉直喝，頭犁犁²睺著腳踏討蹬佢，車頭嘎癩癩倒倒³毋知討幹去哪位？驚到面反青，阿公在後背直頭喝：「睺頭前，睺頭前，佢捉著後盤，你款款仔騎即會用。」即恁，像連續劇共款，跌倒擱跋起來擱騎，著面噉著面騎，阿公單單會拗佢衫褲撥撥个，睺有鑪著無？睺有流血無？擱繼續向前騎，害佢噉

¹ 揸：音 fid`；丟。

² 頭犁犁：音 teu` le` le`；低頭的樣子。

³ 癩癩倒倒：音 deen` deen` doo` doo`；醉醺醺的，喻騎不穩的樣子。

到目汁濫汨⁴滿足苦憐哦！

經過一晨早个特別訓練，像海軍陸戰隊个蛙人恁辛苦，總算學會啊。猶騎去展得阿媽睺，害阿媽著掣一下，目珠擘到大嫵粒。又擱風神騎去得隔壁屋邊个細子睺，展風神。毋過阿公手軟腳軟，坐在泥下氣喘喘直敌大氣，頭下喝佢个氣勢毋知哪位去啊？

轉到屋下阿公拗佢講：成過討學騎車無恁簡單，愛去拗人租，半點鐘五個銀，歸屋下个細子共下學，大漢个扶細漢个輪流騎，一半下無細義跌到烏青紫漚，噉到嘴扁扁嘛毋敢出聲，大人無閒挾掣⁵嘛無法度插，總講細子天生天養，跌到大噉到大，即自自然然學會啊。

到這嘛見睺著人學騎車，真像睺著阿公扶著鐵馬後盤个手，得佢安安心心，總感覺著無離開過，今猶燒燒暖暖在佢个心肝底。

⁴ 目汁濫汨：音 hm` zhib` lam` gam`；淚流滿面。

⁵ 無閒挾掣：音 mo` heen` giab` cheed`；形容忙得不可開交。

111 年全國語文競賽客家語讀者劇場文本國小組（詔安腔）

編號 47 號

【打摔】黃家馨原作

成過，佢真感落雨天，見睺著天氣變烏陰，阿依即會喊佢拗衫褲收入屋內，又吩咐佢續手摺摺个。真愛出去賞个佢，即像得天公爺關到屋下共樣，真毋甘願拗衫褲儘採拗一下，氣勃勃睺著窗門外頭落無歇个雨，阿怙睺佢嘴翹鼻翹，問佢：「你在遐氣麼个？睺你个嘴輪皮會用吊三斤豬肉哦！」佢拗阿怙講：「天公真經和佢做對頭，昨日先生討考佢人走八百公尺，佢直直拜託佢落大雨，結果一滴雨攏無，猶出大日頭，害佢熱到險險暈去；今日係拜六，佢想討去打球，佢嘎拚大雨，佢真經會得佢氣死！」

阿怙行入房間，提出幾下粒摔，隨手拗摔儘採纏一下，在廳下輕輕擊出去，一粒、兩粒、三粒，逐粒都輪真緊，佢睺到真入神，目直直、嘴擘擘毋敢啟氣。過一下子，阿怙又提三條幼線一頭縳在凳面上，一頭用手揪纏，拗泥下纏好線頭个摔，一粒一粒擊到幼線面上，三粒摔即像在遐走相躡，各儕一條線，攏無交雜，佢暢到毋會講个，直直拜託阿怙教佢。

有心打石石成磚，無心打井井無泉，佢認真跔阿怙學幾下擺，即會曉賞啊！佢用倒手提摔，拗線頭放起去，倒手手指公拗

線頭摩躡，用正手開始纏線，頭兩圈定著愛揪纏，續落來纏起去，纏到伸三股一个時即會用啊，換正手尾指纏兩輪，用正手提好摔，倒腳蹬頭前，正腳在後背，正手頭前後背晃幾下下，相準目標，正手到頭前个時出力擊出，摔開始玲瓏楚啊！

打摔个時務，睺摔挨挨轉，有時會打斜，佢人會用索在邊脣憑一下，摔黏時即變正啊；有時縳一條幼線，得摔對這頭行到遐頭，像教摔行路个樣，正經真心色！阿怙講：「人生嘛係恁，愛行自家正確个路，毋罅力个時務，用索在邊脣督一下，摔即會輪較緊；打斜抑係行歪个時務，用索教摔變正，像阿怙長透教你做人个道理共樣。」

這下，隨在佢天公幾時討透風落雨，幾時討出日頭，佢嘛無要緊啊！佢顛倒愛勞力天公爺落大雨，得阿怙毋使出門做事，會用和佢做伴，著面答嘴鼓、著面打摔，真經真心色！人生像摔共樣，直直輪直直楚，各人行自家个路，勞力爺哀、先生和朋友，輒輒在邊脣提醒佢，牽成佢，有佢人个用心指導和鼓勵，佢正有信心去打拚，正毋會行錯路！

111 年全國語文競賽客家語讀者劇場文本國小組（詔安腔）

編號 50 號

【阿咪】李夢花原作

佢屋下自底攞毋識供狗供貓，一來係阿依歸日做事無閒挾掣，攞愛無閒煮三頓，二來係佢真愛淨俐，供狗供貓驚會生蟲嫲。一直到阿弟房間个天蓬竦，逐暗夜一陣老鼠在遐走來走去，乒乒乓乓吵到佢毋會睡，正不得已拗上屋个屋邊，捉一隻貓么來捉老鼠。

屋邊个貓嫲這胎正降兩隻，一隻即係佢屋下這隻，普色合白色和豬肝色花花花，睺起來真精、真得人惜，佢人喊佢「阿咪」。另外遐隻柑子色合白色，嘛真靚，得雜貨店个阿嬭捉去供。阿怙講新捉來个貓，定著愛罔在有四支桌腳个桌下幾下日，按正會認屋，阿怙即拗佢罔在桌腳下。正經有影哦！幾下日過拗放，阿咪即乖乖乖，毋會亂使走。

因為毋識供過貓，阿依嘛毋知討得佢食麼个？人講：貓愛食臊。阿依即用魚脯攪飯飼。一站仔過後，阿怙講：「毋好得佢食傷好食忒飽，慣勢啊即毋會去捉老鼠。」聽雜貨店个阿嬭講佢屋下遐隻，即係食到肥油油，逐日食飽睡、睡飽食，連老鼠在脣頭過，佢正目珠擘開睺一下，又做佢睡。遐幾下日逐晨早，阿怙即

去豬砧買一坵豬肝得阿咪食。第一擺豬肝買轉來，阿依討提來煮熟，阿怙煞著講：「得貓食生豬肝，係愛佢慣勢食生个味，正會去捉老鼠，後次擺佢捉著个老鼠，你討煮熟正得佢食係無？」阿怙講个真有理，佢人聽了哈哈大笑。

阿咪日時頭走到倉庫睡，暗夜時即係佢行動个時間，在暗摸摸个暗夜，睺著佢个目珠仁，像兩粒青色个寶石真金真靚，灶下个黃蜚趨來趨去，佢一爪捉一隻，十分流掠。即毋知佢會曉捉老鼠無？毋過，自阿咪來了後，阿弟間房个天蓬，即無老鼠在遐跳舞啊。

不知不覺，阿咪供有十四年啊，照佢人个年歲來算，佢有七十空歲啊。遐日睺佢懶懶無精神，食个物件又吐出來，好佳載得獸醫睺過注射過，幾下日即好啊。阿依笑笑个對阿咪講：「你和佢共款，老啊。」阿咪真像聽識，第二日捉一隻細隻老鼠挑持罔在灶下，像係討拗阿依講：「莫笑佢老刀嫲無鋼——毋奈何，佢猶攞真慶！」動物除了毋會講事，佢人和人共款，係有感情有靈性个，猶有遐種毋認老个打拚精神。

111 年全國語文競賽客家語讀者劇場文本國小組（詔安腔）

編號 51 號

【大箍呆減肥記】曾菁怡原作

「哇！歸桌恁多好料！汽水、餅、披薩、雞卵糕、枝子冰，猶有佢頭愛食个炸菜、雞髀。」佢睺到無瞞目，口涎水硬硬討滴落來，遐兜好料像拗佢攞手講：「較緊來食，較緊來食哦！」佢煞煞擎一支香噴噴个雞髀，遐油金油金个皮烘到赤赤，肉汁汀汀汀汀，實在真錫人！即在佢嘴擘到大大，準備咬落去个時，嘎聽著：「大箍呆，猶毋跋起來？讀書討毋會赴啊！」全部个好料一下嘎毋見去，幾時，係發夢啊！有一兜仔毋甘願，遐雞髀無咬著，實在真無採啊！

聽佢依講，佢自細即真好嘴斗，生到肥油油，幼皮白肉，真得人惜。阿太即真愛捏佢个嘴顫，講佢像正舂好个菜得人想討咬一口。原本佢無感覺肥油油个身材有麼个無好，毋過遐擺見笑个經驗得佢堅心愛減肥啊。

遐日學校辦校慶活動，佢个班級表演「三隻豬么」个話劇，佢係擔任豬大哥个角色。即在節目進行到豬大哥和豬二哥為著閃避大野狼，討走去豬阿弟个屋藏个時，為著有緊張个氣氛，佢拚命從過去討鑽入豬阿弟个屋內底。仰子會知，一下傷大力，豬阿

弟个屋嘎得佢撞倒去，佢猶仆在屋面上，屎肫翹到半天高，纏繃繃个褲弓到裂線縫……遐時，鬧熱滾滾个禮堂好定泥變到一片恬卒卒，佢猶聽會著自家砰砰嘍个心跳聲，額頭流落來个汗，逐滴佢攞感覺會著……實在真見笑哦！愛仰子正好？落尾，有聲音拗佢解圍啊，佢攔緊企起來行到舞臺脣換褲；遐聲音，毋係佢期待个拍手聲，係大家笑到歸身直直震、目汁雙流个笑聲。

校慶煞遐日，桌岫个奶茶、雞排做一下得佢拗到垃圾桶，佢第一擺有恁堅定个決心，定著愛減肥成功。佢去網路尋減肥个方法，大概係減量、減油、減糖，猶愛配合適當个運動，所以遐兜油潑潑个炸菜、甜漬漬个汽水、糖全部得佢拒絕，逐頓飯菜攞食較清較多菜兜，食到七分飽即好。佢猶逐日運動三十分鐘，行路、打球、跳索……逐日做無共款个變化。

一個月過後，佢依渡佢去買新衫褲，逐領个寸尺攞減兩號，阿依講：「對今日開始毋會用攔喊你『大箍呆』啊。」「係啊！你愛喊佢『緣投哥』啊。」

大箍呆減肥，成功！

111 年全國語文競賽客家語讀者劇場文本國小組（詔安腔）

編號 54 號

【鴨嫲屎蛎¹】徐姿華原作

記得讀二年個時，連續落雨落幾下禮拜，雨落到人攏硬硬討生菇啊！直直到拜三晨早正歇雨，當晝放學猶有日頭花對貴貴個烏雲內底照出來，大家攏真歡喜，排列行出學校門，著雨鞋蠻皮個細子即開始蹬水賞，泥水噴到脣頭個妹子同學吱吱呖，直直閃、直直跳、直直走，笑聲、喝咻聲、罵人聲，跔個轉好天個天氣，大家個心情嘛像慢慢散去個烏雲，愈來愈開。

偈和阿弟轉到屋下頭前個楓樹伯公下，睺著一陣細細隻、頭大大、烏烏個魚，在路脣落雨過後個水窟底，汨來汨去真心色。偈人跔躑直直睺，睺到攏添放好轉，阿媽等無偈人，行出禾坪大聲咻，偈人正真毋甘願行轉屋下。

偈兩儕趁阿媽去睡當晝，偷偷提著空個牛奶粉罐，去楓樹伯公下捉魚，驚大人知會罵，偈人即拗捉著個六尾魚，偷偷供在書桌下，討去上課和放學轉來攏會先去睺下，等討寫字個時正拗佢人提出來園在桌嶼，陪偈人寫字。

第三日打早，阿弟去睺魚了後攏緊討去上課，牛奶粉罐無園

好勢嘎倒去，等偈人下晝轉到屋下，水硬硬討流淨去，罐底淺淺個水伸一尾魚定，另外五尾魚燥死在書桌下啊。偈人心肝真艱難，拗五尾魚埋在花園內底個桂花樹下，希望佢人會用鼻著桂花個香味。伸個遐尾細隻魚，偈人嘛攏較小心細義照顧佢，大約一禮拜換一擺水，猶得佢食嫩嫩個菜葉。

過十外日，遐尾魚嘎生出兩支腳，偈人感覺魚會生腳真心色，忍毋會核偷偷拗阿怙講，阿怙睺了講：「遐毋係魚，係『鴨嫲屎蛎』、係蛎子個細子。」差不多攏過一禮拜，鴨嫲屎蛎又生出頭前腳啊，有四支腳猶有尾，在水底汨來汨去，真風神。

學校歇熱啊，阿依和過去幾年共款渡偈人轉外媽屋下寮一禮拜，偈人心肝底掛念書桌下個鴨嫲屎蛎，旨曾旨即直直亂討轉去。一轉到屋下，阿弟隨從入房間底，黏時即唸到大嫲聲，偈人旨赴攞行李，即走入去房間，睺佢做麼個唸？阿弟比遐空空個牛奶粉罐，和脣頭跳啊跳個蛎子，唸到硬討死，講：「嗚……鴨嫲屎蛎……得蛎子食去啊啦！嗚……」，阿怙聽著，直直掌阿弟個頭那，忍著笑拗阿弟講：「大蠢呆，你個鴨嫲屎蛎大漢啊，變做蛎子啊啦！毋係得蛎子食去。莫唸啦！」，阿弟聽著按講，正轉笑面。

因為童年供「鴨嫲屎蛎」個經驗，得阿弟對自然科學真有興趣，這滿阿弟已經係真得學生歡迎個自然科先生，嘛輒輒會渡細子滿哪位去做研究呢！

¹ 鴨嫲屎蛎：音 ab` ma` shi` guai`；蛎蚪。

【剃頭】張美容原作

前幾下日去剃頭店剃頭，睺著一個兩、三歲个細子，為著剃頭嘍到哀天哀地，大人細子做一下舞到流汗溶滴，實在真苦憐。佢這滿較大漢啊，剃頭个時毋敢嘍，毋過猶係恁驚剃頭，嘛共款恁感剃頭！

佢驚剃頭，係因為佢真無膽，驚師傅手底遐支剪刀和剃頭刀。見擺一坐落凳面上，圍好剃頭巾，睺著師傅擎著剪刀對著佢，佢即開始嘍嘍掣¹，感覺像過千年恁久頭那毛正剪好，堵好想討故一下大氣定，師傅又擎著利利个剃頭刀討來副佢後頭殼个毛腳，這下猶較得人驚。佢驚到頸直直跑、屎肫在凳面上扭來扭去，師傅著面副、著面喝佢毋好停動，無奈何，佢牙根咬个、拳頭嫵搭个，隨在人剮割。若會用走，佢定著起腳步走²，一分鐘攞毋會踟躕著。唉！剃頭實在得人驚！

到三、四年級个起頭下，膽較在³啊，無恁驚剃頭，嘎變做感剃頭，因為師傅遐支嘴真得人感，佢總係在拗佢剃頭个時，講講

一兜有个無个。可能大家係老屋邊過頭熟事啊，佢不時著面剃著面和佢答嘴鼓，一下問：「你个頭那毛落麼个肥，仰子會生到恁靚、恁多？」一下又講：「營養毋好專門搨到頭那毛去，愛食較高兜正有影！毋好像轎車矮佢佢⁴。」佢面皮薄、驚見笑，不時目珠眨眨假無聽著，一食肚苦感想：「愛仰子正好！脣頭个人定著在遐笑佢啦！真感！真感！實在真感剃頭。」

頭冤枉个係，有一擺師傅毋知仰子，剪刀一溜⁵，嘎拗佢个耳子剪一空，血黏時流出來。師傅著面拗佢膏藥，著面唸唸唸講：「頭那毛恁多，真無好剪。」仰子嘎變做佢个毋著！轉到屋下想討拗阿依使妮，無想著阿依毋單無安慰佢，顛倒罵佢講：「毋恬恬坐蹠得人剃！耳子無得人剪莫即真好啊。」佢已經討嘍攞毋得嘴扁，聽著阿依按講，黏時「哇」一聲嘍出來。若係會用，佢甘願頭那毛鬢鬢⁶嘛無愛去剃頭。

剃頭个事，幾下個月即愛攞來一擺，真艱難呢！佢日日想、日日望，想望快快大漢，會用像大人按，去電頭那毛店剪頭那毛，腳翹蹠，有冷氣好吹、有人拗你捉龍，猶有人滃茶得你淋，毋知有幾好咧！

¹ 嘍嘍掣：音 bi bi cheed'；不停發抖。

² 起腳步走：音 ki' gio' pu zeu'；拔腿就跑。

³ 在：音 zai；穩固。

⁴ 矮佢佢：音 e' dud' dud'；矮小的。

⁵ 溜：音 liu'；滑開。

⁶ 頭那毛鬢鬢：音 teu' na' hm' sam' sam'；頭髮蓬鬆散亂。

111 年全國語文競賽客家語讀者劇場文本國小組（詔安腔）

編號 62 號

【秘密森林】林貴珠原作

佢自細真愛在山林內、河溪脣賞寮，一到歇暎日即滿哪位走上走落，賞到佢暗正轉屋下。記得讀小學遐下，總係愛跔阿娥厥依去美濃山下撿樵，阿娥厥怙真早即過身啊，單單靠厥依做小工來供歸屋下大細，阿娥真識事，歇暎日總係會跔厥依去山底撿樵相添，佢輒輒揪衫支尾，和佢人共下去山林內遠寮，對佢來講這座山林攞係寶。

打早佢背著飯包和佢人共下去，在山林底佢人賞鬼捉人，拗這一大片个山林變做佢人个運動坪從上從落，在樹嶼跋上跋落無輸山猴，麼个煩惱早即飛走啊，飛到天恁高，佢个心情即像著靚靚花裙在遐跳舞个蝶，飛上飛落恁誠自在、恁誠歡喜，走到流汗溶滴即去山坑脣賞水，山坑水清又清、啱一口透心涼，坑水涼又甜，較贏雜貨店个枝子冰，接落搨石頭捉蝦、捉老蟹、捉魚，唱著佢自家个山歌，快活个歌聲跔著坑水傳透歸粒山，流過莊頭，流到闊茫茫个天邊。

有時膨鼠來做伴，佢个面頰卵蠕蠕動睭佢人手底个四秀，餵到佢口涎水攞討汀落來啊，真得人惜！猶有領領拜个赤龍公，佢

睭你，你睭佢，有時四腳翹天真心色！行到笏竹下聽著唧唧唧个聲，佢人拗手底銅罐仔裝淦淦个水灌入泥下个空，無幾久即睭著另外一個空趟出土狗，一隻、兩隻有時會灌著三、四隻土狗。賞恹啊坐在相思樹下，山風柔柔吹過樹林，聽土狗唧唧啱挨弦，山坑水和笏竹合奏出大自然个樂曲，這係頭錫人聽个音樂。

樂暢个時間總係恬恬仔溜過，一矚目即到位烏昏愛轉啊，猴嫵背細隻猴攀籬跋壁討轉，佢人嘛蹬著紅霞落山，貓頭鳥咕咕啱拗佢人講「正來寮」，伯嬲孩滿滿个幸福，佢袋淦淦个快樂轉來，感謝這座山林加添佢心色又無共樣个童年生活，感謝一路來和佢做伴成長个好山好水，對佢來講賞遐賞這較輸美濃山下，這係佢心肝底頭靚个秘密森林。

111 年全國語文競賽客家語讀者劇場文本國小組（詔安腔）

編號 63 號

【像戇个个天才】葉秋菊原作

「人不可貌相，海水不可斗量」這句事來講阿明，實在真搭確。佢嘛相信天公爺拗你關莫一扇門，定著會拗你打開另外一扇窗。

見擺佢人討翻分班遐下，心情攞像老鼠跌落米缸底，一裡歡喜一裡擘心，歡喜个係會用熟事新朋友，擘心个係毋知會有牛頭馬面和佢分共班無？記得開學遐日，遠遠睺著一個手癩癩腳跛跛个困子行入教室，遐個人頭臥臥，嘴嚟嚟若行若笑，睺起來戇戇侗侗，佢想佢驚係行毋著教室，愛去隔壁个資源班正著啊！。

遐個困子堵好坐在佢隔壁。先生特別紹介這個困子，講佢喊做張忠明，手腳無利便，拜託坐佢脣頭个人，發揮同學愛，鬥相共照顧。張忠明？佢想講係真聰明，險險笑出聲來，一想著新个一年愛和佢排排坐，面即歪去一半。佢幹頭偷睺佢，欸！生做白淨白淨算係真清秀个困子，總係歸日口涎水落汀汀，拗圍在頸个遐條口涎圍，汀到潦潦，得人睺著目汁攞會流出來，同情心在佢心內慢慢滾絞，佢慢慢幹轉頭拗佢笑一下，感覺著佢真得人惜呢！

佢遐班蠻皮个困子總係愛創治，奈冬瓜無何，提瓠來擲毛，睺忠明好欺負，即學佢行路孔孔翹翹个樣，無即捏佢个屎脰，好性个阿明目瞞瞞在人舞，佢歸食肚懊惱搭緦拳頭嫵，真想討行向前去替佢出頭。

阿明真自重，和佢人共樣上課，共樣寫作業，單單寫字較食力，較摸擘¹定，學生該當愛做个本分，佢毋識推懶過。有一日上數學，先生出一個題目難過上天，佢頭那想到必去²嘛想毋會出來，大家目頭結結無人知，哪會想著阿明竟然毋使兩分鐘即算出來。大家目珠擘到恁大粒，焮鏢³講做鉢嘛無人愛信，戇个仰子會變精呢？幾時佢係一個天才啊，打先想講佢係戇个个佢否勢到面紅激激，真想討尋空鑽落去！

見擺睺著賞到烏天暗地毋知天地个佢人，和提隨身聽恬恬聽英文，嘴迪迪突突⁴背出一大墩英文單字个佢，即會面紅紅，實在係天差地啊！人講：一枝草一點露，天公爺係公平个，雖然無得佢健全个臉身，嘎得佢巧个頭腦，上進个心，在未來个路，毋使為佢煩惱為佢擘心啊。

¹ 摸擘：音 miaˋ sooˋ；動作緩慢。

² 必去：音 bidˋ kuiˋ；裂開。

³ 焮鏢：音 puˋ looˋ；用生鐵鑄的炊具。

⁴ 迪迪突突：音 tidˋ tidˋ tudˋ tudˋ；結結巴巴不流利。

111 年全國語文競賽客家語讀者劇場文本國小組（詔安腔）

編號 64 號

【賣菜】謝惠如原作

記得讀三年遐下，屋下人多食用嘛多，阿依除了田事猶愛款屋下人个三頓，所以利用屋角頭遐埕空地來種菜，種啊種，菜嘍多到食毋會去，只好載去街路賣。

尾冬禾割了後，一個歇暍日阿依愛僱躡佢去鬥賣菜，到菜市場个路脣，阿依擋好鐵馬，拗行李架疊到尖起來个角子菜，下十外拿¹落來喊僱在遐賣，無講橫無講直又隨載去街路沿路賣，放僱一個人在遐呆呆，毋知愛仰子正好。

僱本底即面皮薄，見暍著毋識个人會面紅激激，莫講愛喊人買菜，無奈無何个僱，否勢到頭犁犁，攏毋敢臥起來暍人，好得隔壁賣番薯个老伯嚶暍僱恁恬又驚事，笑笑个講：「妹子么，毋使驚，你做你大聲喝賣菜，人若聽著即會幹過來暍你賣麼个，無定著有佢想討買个菜，鴨嫲嘴愛罔嘍正有通食，來！僱喝得你聽：『來哦！來買番薯哦！好食个番薯又粉又甜哦，包你食了猶會擱轉來買哦！』」聽著老伯嚶个喝賣了後，僱即膽膽試喝：「來哦！來買菜哦！一拿十個銀定。」正喝煞，一個阿姨聽著隨

歇落來買，猶講僱恁乖恁會。聽著佢个安謐，僱暢到若喝若大聲，行過僱面頭前个人，十個有八個大約會擋恬來拗僱買菜，無幾久即賣淨啊，得僱感覺賣菜一兜仔都毋會難。

寒天時日較短，烏昏放學轉到屋下，鞋一脫衫一換，隨走去菜園拗阿依鬥拚菜。暗頭食飽後，和阿哥兩個人開始擇菜、秤菜，僱人負責个事頭，除了拗一頭一頭有黃葉和燥葉个外葉愛擘莫以外，猶愛拗有泥个菜葉摳摳个，整理淨俐好勢了後，一拿一拿秤得佢平重正繩起來。阿依不時交代僱人：「有物件好賣，斤兩定著愛罉，雖然正十箍八毫嘛係錢，秤頭即係路頭，毋好去批人。猶有賣食个物件，自家愛敢食正好提去賣。」這兜事僱歸下記在心。

賣菜雖然係一種小生理趁無麼个錢，嘛無麼个大學問，毋過對這擇菜、賣菜个過程內底，得僱學著真多做人做事个道理。

¹ 下十外拿：音 ha shib` nguai na`；解下十多把。

111 年全國語文競賽客家語讀者劇場文本國小組（詔安腔）

編號 69 號

【鬧熱个落雨天】曾菁怡原作

鬧鐘鈴、鈴、鈴鳴啊！大嫲聲喊佢愛較緊跋起來，若擱搵眠床即會毋會赴去學校讀書啊。佢目珠眯眯伸手拗鬧鐘抑莫，猶倒在舒適个眠床，毋盼得和佢分開。咦！毋係天光啊？外頭仰子猶暗摸胥疏？探頭睜出去，幾時係天公派烏雲使者來通知佢人一討落雨啊！

有人認為落雨天係麻煩天，出門愛著雨衫，無即擎雨傘，無細義衫褲又會涿到溼漉漉，去哪位攏無利便。學生真感無法度出去打球、賞祭，一下課先生即顧蹠，麼儕攏毋會用出去涿雨，所以一睜著落雨，大家即唉唉唧唧，目直直睜著雨水占歸個運動坪，實在真愠悴哦！

毋過，落雨天對佢來講嗰係真鬧熱个日。晨早一出門，街路攏係淅淅个車，這裡嘩嘩、遐裡叭叭，像久無睜个朋友，大家尖共下講起恁久無見面个思念。遐兜行路个人，擎著一支支雨傘花，雨水一濕潤，即開出五彩个花蕊，行來行去像在比麼儕个花較靚。你若係聽較精兜，遐雨水打在車嶼、屋嶼、水窟抑係樹葉面上个聲歸下無共樣，有高，有低；有大聲，有細聲，像唱歌得

你聽共款。有時，雷公猶會用曠燼打燈光，用鳴雷伴奏，你講，係毋係真心色？

佢頭愛在落雨天打早即去學校，因為遐兜普通時藏核核个露螺、蟲蟻做一下攏會出來賞水。學校圍牆係抹紅泥个，壁面个青苔青拚拚，落雨遐時，露螺趁上趁下一陣一陣，有个相比麼儕趁較緊，有个彎來幹去做畫圖个藝術家，有个歇在圍牆面上享受得雨涿个清涼，逍遙自在。

落雨天出來賞祭个蟲蟻頭好膽，衫褲無著即攏緊緊出來賞水，溝底洛洛滾个水流真刺激，幾下尾蟲蟻得水沖過去猶會搖來擺去，暢到毋會奈。有个蟲蟻真慧面趁到路面，較勇个猶會用趁轉去；較嫻个歸氣橫在路頭，在天公做主啊！

鬧熱个落雨天，有人懊惱，有人歡喜，天公無法度得逐儕滿意，只有恁自家改變想法，毋管麼个天攏係好天。